

講論然後用之若甚凶也則應箕等豈有計其功役之重而遂用之哉二十餘年以遠之陵豈可無大患而遷之乎顯德王后遷葬時予親見之甚為多事今若遷葬則世子亦當為初喪之服也予意以為不可遷也○壬申 御夕講○日本國使臣宣慰使李瀛啓曰臣以新價外加

給之意言於倭使則曰於吾輩之心豈不欲為之乎但前者一鶚東堂從新價貿易以歸而被重罪我則決不可以新價為之也云傳曰知道仍傳于政院曰新價之外加給事禮曹與戶曹同議而言于倭人倭人以為前者一鶚東堂從新價而被重罪我則決不可以從新價也云如朱紅則用之於三殿器用其用甚緊今若不買則後必專不持來臨用儲之何以為之猶必以新價買之乎招政府郎官議于大臣○臺諫啓

前事鄭沂事如啓餘不見○刑曹啓曰疑獄前日有

命抄啓矣臣等

見盡負車漢元等七人詣工曹泥金匠金子孫相鬪歐打而千孫者即日身死盡負七人之中漢元為主故別推之矣但千孫本以六十餘歲之人受杖於工曹即於工曹門前與盡負等相鬪而死此事近於疑獄故并其推案而敢啓傳曰可於政府合坐之日議之○日暈艮方坤方有氣如火○癸酉 御朝講臺諫論遷陵事領事金安老曰貞顯王后